

TPM gesa henti jualan gula-gula 'Ghost Smoke'

Ibu bapa diminta tingkat pemantauan elak masalah jadi penyakit dalam masyarakat

Oleh Wan Faizal Ismayatim
wfaizal@bh.com.my

Putrajaya: Timbalan Perdana Menteri, Datuk Seri Dr Wan Azizah Wan Ismail, mahu penjualan gula-gula *Ghost Smoke* yang mengeluarkan asap seakan-akan rokok apabila disedut dihentikan segera.

Menurut laporan *BERNAMA*, Dr Azizah yang juga Menteri Pembangunan Wanita, Keluarga dan Masyarakat, turut meminta ibu bapa meningkatkan pemantauan ke atas anak masing-masing.

"Saya tidak mahu perkara ini menjadi penyakit masyarakat yang menular dalam kalangan kanak-kanak sejak kecil lagi," katanya ketika diminta mengulas mengenai *Ghost Smoke* selepas majlis Siri Wacana Sri Satria di sini, semalam.

Baru-baru ini, media melaporkan mengenai kebimbangan ibu bapa berhubung penjualan gula-gula berkenaan yang mengeluarkan asap seakan-akan rokok apabila disedut.

Dr Wan Azizah tidak menolak kemungkinan gula-gula itu boleh menjadi permulaan kepada ma-



Dr Wan Azizah beramah mesra dengan tetamu pada majlis Siri Wacana Sri Satria di Putrajaya, semalam.

(Foto Ahmad Irham Mohd Noor/BH)

salah penagihan dadah.

"Dulu *smoking* (merokok). Kemudian dadah dan syabu," katanya.

Sementara itu, Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail, mengarahkan penguat kuasa kementerian turun padang bagi memeriksa dan memantau penjualan gula-gula itu yang dilaporkan dijual secara terbuka kepada murid sekolah.

Katanya, tindakan tegas akan dikenakan terhadap pihak yang menjual produk itu jika didapati melanggar peraturan mengikut bidang kuasa kementeriannya, seterusnya mengekang penjualannya.

Beliau berkata, kementeriannya akan memeriksa dari mana produk gula-gula *Ghost Smoke* di-

Saya tidak menolak kemungkinan gula-gula itu boleh menjadi permulaan kepada masalah penagihan dadah.

Dr Wan Azizah Wan Ismail,
Timbalan Perdana Menteri

hasilkan dan sama ada ia mematuhi Perintah Kawalan Harga (Pelabelan oleh Pengilang, Pengimport, Pengeluar atau Penjual Borong) 1980 sebelum sebarang tindakan lanjut diambil.

"Setiap produk tersedia bungkus di pasaran perlu patuhi penandaan butiran seperti diperun-

tukkan mengikut perintah itu.

"Bahagian Penguatkuasaan (KPDNHEP) kena tingkatkan kemampuan (pemeriksaan), ini produk yang baru timbul dan menjadi kegemaran anak.

"Selepas tinjauan penguatkuasaan, pihak penguat kuasa perlu segera memberi laporan balas, kita nak tahu produk ini datang dari mana dan adakah patuh Perintah Kawalan Harga sebelum mengambil tindakan susulan," katanya selepas mempengerusikan Mesyuarat Majlis Perundingan Penjaja dan Peniaga Kecil di sini, semalam.

Mengulas lanjut, Saifuddin Nasution berkata, pihaknya akan mengenal pasti sama ada gula-gula itu dijual berleluasa di seluruh negara atau hanya ada di kawasan tertentu, misalnya di Lembah Klang dan beberapa daerah lain.

Kementerian Kesihatan mula siasatan



Petaling Jaya: Kementerian Kesihatan memulakan siasatan dan penguatkuasaan berhubung penjualan gula-gula *Ghost Smoke* di seluruh negara.

Menteri Kesihatan, Datuk Seri Dr Dzulkefly Ahmad, berkata Bahagian Kualiti dan Keselamatan Makanan di bawah kementerian itu menyiasat perkara itu secara menyeluruh dan akan bekerjasama dengan Kementerian Perdagangan Dalam Negeri dan Hal Ehwal Pengguna (KPDNHEP).

“Ia (penjualan gula-gula *Ghost Smoke*) sesuatu yang mengejutkan, terutama cara ia dipasarkan dalam kalangan pelajar sekolah.

“Perkara ini kita perhatikan dan akan mengambil tindakan segera. Kita tidak akan membarkannya,” katanya pada sidang media selepas melancarkan prog-

ram Neuropsychiatry Masterclass 2019 di sini, semalam.

Kelmarin, media melaporkan kebimbangan ibu bapa berhubung penjualan gula-gula *Ghost Smoke* yang mengeluarkan asap seakan-akan rokok apabila disedut.

Pengerusi Persatuan Ibu Bapa dan Guru (PIBG) Sekolah Kebangsaan (SK) Pekan Papar, Mohd Fauzi Sahat, berkata beliau mendapati gula-gula itu dijual berleluasa di Papar, Sabah, yang dibeli pelajar sekolah.

Katanya, gula-gula itu juga turut dijual berleluasa di daerah lain, termasuk di Kota Kinabalu dan kebanyakannya dibawa dari luar sekolah oleh murid.

Ditanya sumber gula-gula berkenaan, Dzulkefly berkata, beliau belum mendapat laporan dan akan menyiasat mengenainya.